

ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ՔՈՒԷՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ՆՈՐ ՇՐՋԱՆ, Թ. Տարի, Թիւ 383, Ուրբաթ, 05 ՄԱՅԻՍ, 2017

ՀԱՄԱՅՆՔԱՅԻՆ

ԱՌԱՋՆՈՐԴ ՀԱՅՐ ՍՈՒՐԲԸ ՊԱՏԱՐԱԳԵՑ ՊԱՀՐԷՅՆԻ ՄԷՋ ԵՒ ՀՐԱԻՒՐԵՑ ՇՐՋԱՆԻ ՀԱՅՈՒԹԻՒՆԸ ՄԱՍՆԱԿՑԵԼՈՒ ՔՈՒԷՅԹԻ ՆՈՐ ԵԿԵՂԵՑԻՈՅ ՕԾՄԱՆ

Ուրբաթ, 28 Ապրիլ 2017-ին Թեմիս Առաջնորդ Գերպ. Ս. Մասիս Ծ. Վրդ. Զօպուեան միօրեայ այցելութեամբ գտնուեցաւ Պահրէյն ուր պատարագեց եւ քարոզեց տեղւոյն Յոյն Ուղղափառ եկեղեցւոյ մէջ: Պատարագին ներկայ գտնուեցան Պահրէյնի եւ Սէուտական Արաբիոյ Խուպար շրջանէն ժամանած հայեր: Հայր Սուրբի պատուիրակութեան մաս կազմեցին Քուէյթի Ազգ. Վարչութեան ատենապետ տիար Մունիր Դարբինեան, վարչութեան անդամ Բժ. Յակոբ Մերայտարեան, դպրապետ տիար Քեռի Սարգիսեան եւ եկեղեցւոյ սարկաւազներէն Ռոստոմ Սարգիսեան:



Իր քարոզին սկիզբը Հայր Սուրբը ներկաներուն փոխանցեց Մեծի Տանն Կիլիկիոյ Գահակալ՝ Ն.Ս.Օ.Տ.Տ. Արամ Ա. Կաթողիկոսի հայրական օրհնութիւններն ու ողջոյնները եւ մաղթեց, ինչպէս Նորին Սրբութիւնը հոչակած էր, որ 2017 տարին ըլլայ վերանորոգութեան տարի բոլորիս համար: Ապա Հայր Սուրբը անդրադարձաւ Սուրբ Յարութեան խորհուրդէն բխող կարգ մը ճշմարտութիւններու: Իր Քարոզին մէջ Հայր Սուրբը յիշեց, որ Ապրիլ ամիսը նաեւ հայու յարութեան ամիսն է, երբ ան յարութիւն եւ կեանք առաւ Տէր Զօրի աւազներէն, որովհետեւ հաւատաց, հետեւեցաւ

Անոր որ մեռաւ, յարութիւն առաւ եւ կենդանի է յաւիտեանս: Իր քարոզի աւարտին Առաջնորդ Հայր Սուրբը կարեւորութեամբ անդրադարձաւ Մայիս 15-21 օրերուն Մեծի Տանն Կիլիկիոյ Գահակալ՝ Ն.Ս.Օ.Տ.Տ. Արամ Ա. Կաթողիկոսին Թեմիս կատարելիք հովուապետական եւ պատմական այցելութեան, որու ընթացքին, Նորին Սրբութիւնը Ուրբաթ 19 Մայիսի երեկոյեան օծումը եւ բացումը պիտի կատարէ Քուէյթի նոր եկեղեցւոյ եւ ազգային առաջնորդարանին եւ հանդիպի մեր ժողովուրդի զաւակներուն հետ: Հայր Սուրբը հրաւիրեց շրջանի հայութիւնը միանալու քուէթահայութեան եւ վայելելու պատմական այդ օրերը, մանաւանդ մասնակցելու նոր եկեղեցւոյ օծման արարողութեան եւ ստանալու Վեհափառ Հայրապետին օրհնութիւնները:

Պատարագի աւարտին Հայր Սուրբը շնորհակալութիւն յայտնեց Պահրէյնի Յոյն Ուղղափառ եկեղեցւոյ հոգեւոր հովիւ Տ. Սապա Հայտոսեան քահանային, Պահրէյնի մեր ազգայիններէն Տիար Միքո Հայթաեանին եւ Մեռուտական Արաբիոյ Խուպար շրջանէն տիար Սեդրակ Տաքէսեանին որոնք կազմակերպած էին Հայր Սուրբին այն այցելութիւնը: Պատարագէն ետք տեղի ունեցաւ ճաշկերոյթ, ուր Հայր Սուրբին առիթը ընծայուեցաւ մօտէն ծանօթանալու համայնքի զաւակներուն:

ՔՈՒԷՅԹԻ ԱԶԳԱՅԻՆ ՎԱՐՇԱՐԱՆԻ ՈՒՍՈՒՑԻՉՆԵՐՈՒ ՎԵՐԱՊԱՏՐԱՍՏՄԱՆ ՍԵՄԻՆԱՐ

Շաբաթ, 29 Ապրիլ 2017ին կազմակերպութեամբ եւ գործադրութեամբ Քուէյթի Ազգային վարժարանի Ուսումնական խորհուրդին, տեղի ունեցաւ ուսուցիչներու վերապատրաստման եզակի սեմինար մը «Քոստա Տէլ Մոլ» Պանդոկէն ներս: Ք.Ա.Վ. ի տնօրէն Տոքթ. Ներսէս Սարգիսեան իր ողջոյնի խօսքին մէջ շեշտեց Ք.Ա.Վ.վարժարանի բարեկարգման կարեւորութիւնը, ըսելով, այդ երկար ճամբան պէտք է սկսիլ այսօր՝ առաջին այս քայլով: Ուսումնական խորհուրդի ատենապետ՝ Տիար Եղիա Կարպուշեան ներկայացուց խորհուրդի աշխատանքներն ու սեմինարի օրակարգերը:



Սեմինարի ընթացքին հարուստ մեկնաբանութեամբ ելոյթ ունեցաւ Տիկ. Թինա Թապաքեան, որ ներկաներուն ներկայացուց 21-րդ դարու պահանջներն ու հրամայականները կրթական համակարգէն ներս, հաստատելով, որ հայ դպրոցը մերօրեայ կրթական զարգացումներուն հետ քայլ պահելու համար պէտք է վերապատրաստէ իր ուսուցչական կազմը, : Ան նաեւ բացատրեց Class Dojo ծրագիրը: Տիկ. Թապաքեանը նաեւ ներկայացուց փունջ մը կայքէջեր, որոնք կ'օժանդակեն ուսուցիչներուն դասապատրաստութեան համար:

Ապա ACA դպրոցի ուսողութեան գլխաւոր դասատու՝ պրն. Դաւիթ Գարայեան ներկայացուց Google Drive, եւ այլ նոր համակարգչային ծրագիրներ, շեշտելով անոնց անհրաժեշտութիւնը դպրոցավարութեան համակարգին մէջ: Աւարտին, Դոկտ. Արտա Ճեպէճեան ամփոփեց սեմինարի օրակարգերը ու խրախուսեց ուսուցչական կազմը, հետամուտ ըլլալու մանկավարժական բոլոր նորարար մտքերու եւ մեթոտներու, վերականգնելու համար հայ դպրոցը եւ անոր ընդմէջէն ապագայ հայ մարդը: Յիշենք նաեւ, որ մասնակցողները պատասխանելով յատուկ հարցախոյզի մը, զորս պատրաստուած էր խորհուրդին կողմէ, ընդհանուր պատկեր մը փոխանցեցին իրենց աշխատանքներուն եւ դժուարութիւններուն մասին:

www.armenianprelacykw.org

ՀԱՅԿԱԿԱՆ

Կեդրոնական Ընտրական Ցանձնախումբը Հրապարակեց Ազգային Ժողովի Վերջնական Պատկերը

Հայաստանի Հանրապետության Կեդրոնական ընտրական յանձնախումբը հրապարակած է պատգամաւորական աթոռէ հրաժարածներու անունները:



ՀՅԴ-էն ինքնաբացարկ յայտնած են՝ Դաւիթ Լոքեան, Լեւոն Մկրտչեան եւ Արծուիկ Մինասեան:

Խորհրդարանին մէջ ՀՅԴ-ն պիտի ներկայացնեն՝ Արմէն Ռուստամեան, Աղուան Վարդանեան, Արմէնուհի Կիրեղեան, Արմէն Բաբայեան (Լոքեանի, Մկրտչեանի եւ Մինասեանի ինքնաբացարկներէն ետք):

Վարկանշային համակարգով՝ թիւ 6 ընտրատարածքէն՝ Անդրանիկ Կարապետեան, թիւ 13 ընտրատարածքէն՝ Սուրէն Մանուկեան, իսկ թիւ 11 ընտրատարածքէն՝ Ռոմիկ Մանուկեան:

Նշենք, որ Ազգային ժողովը պիտի ունենայ 105 պատգամաւոր. 58-ը՝ Հայաստանի Հանրապետական կուսակցութենէն, 31-ը՝ «Ծառուկեան» դաշինքէն, 9-ը՝ «Ելք»-էն եւ 7-ը՝ Հայ յեղափոխական դաշնակցութենէն:

Նորընտիր Ազգային ժողովի առաջին նիստը տեղի պիտի ունենայ 18 մայիս 2017-ին, առաւօտեան ժամը 10:00-ին:

Ռուսիոյ Պաշտպանութեան Նախարարութեան Պատուիրակութիւնը Հասած Է Հայաստան



Հայաստանի Հանրապետության եւ Ռուսիոյ պաշտպանութեան նախարարութիւններու երկկողմանի համագործակցութեան 2017-ի ծրագիրի շրջագիծին մէջ 2 մայիսին Հայաստան հասած է Ռուսիոյ պաշտպանութեան նախարարութեան պատուիրակութիւնը՝ Ռուսիոյ պաշտպանութեան նախարարութեան զինուորական ոստիկանութեան գլխաւոր վարչութեան պետի տեղակալ, գնդապետ-գորավար Վիթալի Քոխի գլխաւորութեամբ:

Ըստ Հայաստանի պաշտպանութեան նախարարութեան, այցելութեան ընթացքին նախատեսուած է քննարկել Հայաստանի տարածքին Ռուսիոյ պաշտպանութեան նախարարութեան զինուորական ոստիկանութեան մարմիններու գործունէութեան մասին հայ-ռուսական միջպետական համաձայնագիրի նախագիծը, ինչպէս նաեւ զինուորական ոստիկանութեան ստորաբաժանումներու գործառոյթներուն առնչուող հարցեր:

Հրանդ Մարգարեան. «Վարչապետին Հետ Բնականոն Ցարաբերություններ Ունին»

Յառաջիկայ մեկ շաբթուան ընթացքին ՀՅԴ-ն եւ ՀՀԿ-ն համագործակցութեան յուշագիր պիտի ստորագրեն: Այս եւ այլ հարցերու շուրջ «Երկիր»-ը գրուցած է ՀՅԴ Բիւրոյի ներկայացուցիչ Հրանդ Մարգարեանին հետ:

Պատասխանելով այն մատնանշումին, որ նախորդող օրերուն մամուլին մէջ յամառօրէն կը պնդուի, թէ ՀՅԴ-ի եւ վարչապետ Կարէն Կարապետեանի միջեւ յարաբերությունները լարուած են, Հրանդ Մարգարեան ըսած է. «Կը կարծեմ, որ անոնք, որոնք նման լուրեր կը տարածեն, այլ նպատակներ կը հետապնդեն: Իրականութեան մէջ լարուածութիւն չկայ: «Լարուածութիւն»-ը այս պարագային շատ կոպիտ բառ է: Բնականաբար, մարդիկ ենք, տեսակէտներ ունինք, քննարկումներ տեղի կ'ունենան, բայց, վերջ ի վերջոյ, կը տրուին որոշումներ: Համաձայնագիրի բնագիրը պատրաստ է, չստորագրելու պատճառ չկայ, կը սպասէինք Սահմանադրական դատարանի որոշումը: Կը կարծեմ, որ մօտ օրէն պիտի կատարուի ստորագրման արարողությունը:

Մենք ունինք բնականոն յարաբերություններ վարչապետին հետ, ունինք տեսակէտներ, երբեմն այդ տեսակէտները կը նոյնանան, երբեմն՝ կը տարբերին, բայց մեր յարաբերություններուն մէջ որեւէ լարուածութիւն չկայ»:

Պատասխանելով այն հարցումին, թէ արդեօք ՀՀԿ-ՀՅԴ նոր ստորագրուելիք յուշագիրը անժամկէտ է, թէ՛ մինչեւ 2018 թուականն է, Հրանդ Մարգարեան ըսած է. «Այս հանգրուանին մեր նոր համաձայնագիրը, ինչպէս նախորդը, բնականաբար, անժամկէտ պիտի ըլլայ: Սակայն նոյն համաձայնագիրին մէջ նաեւ գրուած է, թէ ո՛ր պարագաներուն անհկա կրնայ չեղեալ նկատուիլ: Համաձայնագիրը չեղեալ յայտարարելու ձեւը նախատեսած ենք, բայց համագործակցութեան համար ժամկէտ չենք նշած»:

ՀՅԴ Բիւրոյի ներկայացուցիչ Հրանդ Մարգարեանին հետ կատարուած հարցազրոյցին ամբողջութիւնը կու տանք հետագային:

Բաբայեան. «Եթէ Ռազմափորձերուն Ընթացքին Սադրանքներ Ըլլան, Մենք Պիտի Արձագանգենք»

Արցախի Հանրապետութիւնը խստօրէն կը դատապարտէ Ազրպէյճանի եւ Թուրքիոյ զինուած ուժերու միացեալ ռազմափորձերը:

«Եթէ սադրանքներ ըլլան, մենք պիտի արձագանգենք», գերմանական «Տի. Փի. Էյ.» գործակալութեան հետ զրոյցի մը ընթացքին յայտարարած է Արցախի Հանրապետութեան նախագահի աշխատակազմի ղեկավարի տեղակալ Դաւիթ Բաբայեան:



Նշենք, որ Ազրպէյճանի եւ Թուրքիոյ զինուած ուժերը միացեալ ռազմափորձերու սկսած են 1 մայիսին, անոնք կը շարունակուին մինչեւ 5 մայիս:

Հաւանական է, ՈՐ ՀՅԴ -ՀՀԿ Քաղաքական Համաձայնագիրը Այս Շաբաթ Ստորագրուի

Հայ յեղափոխական դաշնակցութեան եւ Հայաստանի հանրապետական կուսակցութեան միջեւ համաձայնական կառավարութիւն կազմելու վերաբերեալ բանակցութիւնները գրեթէ աւարտած են:

«Ազատութիւն» ձայնասփիւռի կայանին հետ գրոյցի մը ընթացքին այս մասին ըսած է ՀՅԴ Բիւրոյի քաղաքական ներկայացուցիչ Արմէն Ռուստամեան:



«Նոր Ազգային ժողովի կանոնակարգը կը նախատեսէ, որ բաժնուին կառավարող եւ ընդդիմադիր խմբակցութիւնները:

Պահանջ կայ, որ պէտք է այս յստակութիւնը անպայման մտնէ, ինչ որ կ'ենթադրէ նաեւ յուշագիր ստորագրել, քաղաքական համաձայնագիր ստորագրելու մասին յուշագիր, որուն վրայ մենք կ'աշխատինք», ըսած է Արմէն Ռուստամեան:

Պատասխանելով այն հարցումին, թէ ե՞րբ վերջնականապէս կ'աւարտին բանակցութիւնները, Ռուստամեան ըսած է, թէ չի բացառուիր, որ այս շաբաթ աւարտին:

«Հաւանական է, որ քաղաքական համաձայնագիրը արդէն այս շաբաթ ստորագրուի: Մենք պատրաստ էինք ամէն պահու այդ ստորագրութիւնը կատարել, բայց կար Սահմանադրական դատարանի դիմումը», նշած է Ա. Ռուստամեան:

Նոր փաստաթուղթով, Ռուստամեանի փոխանցումով, կը դասաւորուի նաեւ քատրային քաղաքականութիւնը:

«Մինչեւ հիմա նշանակումները եղած են անաչառ եւ ամբողջապէս հիմնաւոր ընտրութիւն կատարելու միջոցով», ըսած է ան:

Պատասխանելով այն հարցումին, թէ ճի՞շդ են արդեօք լուրերը, որ կը բանակցին մէկ նախարար եւս ունենալու հարցով, կ'ուզեն արդեօք մէկ նախարար եւս ունենալ, Արմէն Ռուստամեան նշեց. «Ո՞վ չ'ուզեր, որ աւելնան[®] Խնդիրը աւելիի կամ պակասի հարցը չէ: Կարելոր է, որ համագործակցութեան մեքանիզմը գործէ եւ որոշումները տրուին՝ ձգտելով բոլոր հարցերուն մէջ համախոհութեան: Ասիկա գլխաւոր հարցն է: Նոր կառավարութեան գլխաւոր հարցերէն մէկը պէտք է ըլլայ ճիշդ կառուցուածքն ու գործունէութեան կարգի ամրագրումը»:

Ռուստամեան ըսաւ, որ ՀՀԿ-ին հետ կը բանակցին ոլորտներու շուրջ, անձերու շուրջ, բայց քանի որ հանգուցալուծման տակաւին չեն հասած, փակագիծերը կարելի չէ բանալ:

www.aztarar.com



Կազմակերպություն՝

ՀԱՄԱԶԳԱՅԻՆԻ ՔՈՒԷՅԹԻ ՄԵԿՈՒՍԻ ԿԱԶՄԻ ՎԱՐՉՈՒԹԵԱՆ **ԳԵՂԱՐՈՒԵՍՏԱԿԱՆ ԵՐԵԿՈՅ**

Հովանավորություն՝

Քուեյթի և Երզակայից Թեմի Առաջնորդ

Գերայ. Տ. Մասիս Ծ. վրդ. Զօպույեանի

Ուրբաթ, 12 Մայիս 2017-ի երեկոյեան ժամը 7:30-ին

مسرح المدارس الخاصة -ի մէջ

Ելոյթ կ'ունենան

«ԲԱՐՍԵՂ ԿԱՆԱԶԵԱՆ» Երգչախումբը

Խմբավարություն՝

Պրն. Ճորճ Արապաթլեանի

« ՇԱՔԷ » Պարախումբը

Ղեկավարություն՝ Հայրենի վաստակաւոր պարուսոյց

Պրն. Գարիկ Խաչիկեանի

Եւ

Խումբ մը Տաղանդաւոր արուեստասէրներ

*Մերով կը երաւեստենք ժեզ վաշտեւելու հաշ ժշակոչի շուհշով ցոցցոխաւան
ցեղեպիկ երեկոչ ծե*

Շտապեցէք ապահովել ձեր տոմսերը, դիմելով -

Ընկ. Մեսրոպ Թասլաքեանի

97929724

Ընկի. Հուրի Պերպերեանի

66822662

Ընկի. Ալվարդ Պապլանեանի

66609202

Ընկի. Մայտա Մովսեսեանի

99483143

ՄԻՋԱԶԳԱՅԻՆ

Իրան Թուրքիոյ Կոչ Կ'ուղղէ Դադրեցնելու Իրաքի Եւ Սուրիոյ Մէջ Օդային Ցարձակումները

«Մի.Էն.Էն. Թիրք» կը հաղորդէ, որ Իրանի արտաքին գործոց նախարարութեան բանբեր Պահրամ Քասեմի քննադատած է Թուրքիան Սուրիոյ եւ Իրաքի մէջ անոր կատարած օդային յարձակումներուն համար:



Ան Թուրքիոյ կոչ ուղղած է անմիջապէս դադրեցնելու զինուորական գործողութիւնները, որոնց շուրջ համաձայնութիւն չէ գոյացած Իրաքի եւ Սուրիոյ իշխանութիւններուն հետ, եւ որոնք կը խախտեն միջազգային չափանիշերը:

Անդրադառնալով իրաքեան Քիրտիստանի մէջ անկախութեան հանրաքուէի կարելիութեան՝ Քասեմի նշած է, որ Իրան կ'աջակցի Իրաքի տարածքային ամբողջականութեան, եւ Իրաքի քիւրտերը եւս ըստ սահմանադրութեան, իրաւունք չունին ընդդիմանալու այդ երկրի տարածքային ամբողջականութեան:

Թրքական օդուժը օրեր առաջ օդային յարձակումներ կատարած էր Սուրիոյ եւ Իրաքի հիւսիսային շրջաններուն մէջ, այդ յարձակումներուն պատճառով ալ սպաննուած էին Սուրիոյ մէջ գործող քրտական Ժողովուրդի պաշտպանութեան ջոկատներու 18 եւ Իրաքի մէջ 8 քիւրտ զինեալներ:

Թուրքիոյ Հարցով Զեկուցողը Կոչ Կ'ուղղէ Դադրեցնելու Եւրոպական Միութեան Անդամակցութեան Շուրջ Բանակցութիւնները

Եւրոպական խորհրդարանի՝ Թուրքիոյ հարցով զեկուցող Քեթի Փիրի գերմանական «Տի Վելթ» օրաթերթին հետ զրոյցի ընթացքին յայտարարած է, որ Եւրոպական Միութեան ու Թուրքիոյ միջեւ բանակցութիւններու նոր գլուխ բանալու մասին խօսք չի կրնար ըլլալ: Այս մասին կը հաղորդէ «Արմէնփրես»:



«Եթէ Թուրքիան իսկապէս կը հետաքրքրուի անդամակցութեան հարցով, անհրաժեշտ է, որ Անգարան այդ հետաքրքրութիւնը ցոյց տայ», նշած է Փիրի:

Ան յայտարարած է, որ անդամակցութեան հարցին մէջ Եւրոպական Միութեան որեւէ երկրի, ներառեալ Թուրքիոյ սպառնալիքներուն չեն պատրաստուիր ենթարկուիլ: «Եթէ կ'ուզեն մուտք գործել Եւրոպական Միութիւն, ստիպուած են բաւարարել չափանիշները: Սակայն Թուրքիոյ մէջ բացարձակապէս այդպիսի բան չեմ տեսներ: Այդ պատճառով անհրաժեշտ է, որ բանակցութիւնները դադրեցուին», ըսած է Փիրի:

Թուրքիոյ նախագահ Ռեճեփ Թայիփ Էրտողան 2 մայիսին խօսելով Եւրոպական Միութեան անդամակցութեան մասին ըսած էր. «Եւրոպական Միութիւնը այլընտրանք չունի, քան բանակցութիւններու նոր գլուխներ բանալ: Եթէ չբանաք, ուրեմն յաջողութիւն ձեզի»:

Միւս կողմէ, «Տեօչէ Վելլէ» կը հաղորդէ, որ Գերմանիոյ վարչապետ Անկելա Մերքել յայտարարած է, որ Թուրքիոյ մէջ մահապատիժի վերականգնման պարագային այդ երկրի Եւրոպական Միութեան անդամակցութեան շուրջ բանակցութիւնները պիտի դառնան անհիմն:

Մերքել ընդգծած է, որ իբրեւ վարչապետ՝ ամբողջովին ազատ է Թուրքիոյ մէջ տեղի ունեցող մտահոգիչ զարգացումները արտայայտելու հարցին մէջ եւ աստիկա կ'ընէ ո՛չ միայն հասարակութեան առջեւ, այլ նաեւ թրքական իշխանութեան ներկայացուցիչներու հետ հանդիպումներուն ընթացքին:

Մոսկուայի Եւ Անգարայի Միջեւ «Յարաբերութիւնները Վերականգնած Են»

Երէկ Սոչիի մէջ տեղի ունեցած Փութին-Էրտողան հանդիպումէն ետք մամլոյ ասուլիսի մը ընթացքին, Ռուսիոյ նախագահ Վլատիմիր Փութին ըսած է, թէ Մոսկուայի եւ Անգարայի միջեւ յարաբերութիւնները վերականգնած են ճգնաժամէ մը ետք:

Նշենք, թէ նախագահներու մակարդակով տեղի ունեցած հանդիպումը այս տարուան մէջ երկրորդն է: Հանդիպումը նախօրօք ծրագրուած չէր եւ տեղի ունեցած է ռուսական կողմին նախաձեռնութեամբ:

Լրատուամիջոցները կը հաղորդեն, որ Սոչիի մէջ տեղի ունեցած Փութին-Էրտողան հանդիպումին քննարկուած են Սուրիոյ Իսլիպ նահանգին մէջ յատուկ գօտի ստեղծելու հարցը: Նշեալ հարցի քննարկումին մասին մանրամասնութիւններ չկան:

Երկու նախագահները յայտարարած են, որ Սուրիոյ տագնապը պէտք է լուծել դիւանագիտական միջոցներով:

Թիլըրսըն Թրամփ-Փութին Հեռաձայնային Հաղորդակցութիւնը Կ'որակէ «Շատ Կառուցողական»



Միացեալ Նահանգներու արտաքին գործոց նախարար Ռեքս Թիլըրսըն Միացեալ Նահանգներու եւ Ռուսիոյ նախագահներ Տանըլտ Թրամփի եւ Վլատիմիր Փութինի միջեւ հեռաձայնային հաղորդակցութիւնը որակած է շատ կառուցողական:

«Ատիկա շատ կառուցողական հեռաձայնային հաղորդակցութիւն էր նախագահներուն միջեւ. շատ դրական գրոյց եւ միտքերու հանգամանալից փոխանակում: Եկէք տեսնենք, թէ ի՛նչ տեղի պիտի ունենայ...», ըսած է ամերիկեան դիւանագիտութեան պետը:

Սպիտակ տունը իր կարգին հաղորդած է, որ «գրոյցը շատ լաւ էր», եւ ատոր ընթացքին քննարկուած է Սուրիոյ մէջ անվտանգութեան գօտիներու ստեղծման հարցը «կայուն խաղաղութեան հասնելու համար»:

Սուրիոյ մէջ «Լարուածութեան Մեղմացման» 4 Գօտիներու Ստեղծման Շուրջ Ռուսիա-Թուրքիա-Իրան Համաձայնութիւն

«Ինթըրֆաքս-Ղազախստան» հաղորդեց, որ Ռուսիա, Իրան եւ Թուրքիա «Ասթանա-4» հանդիպումի լիագումար նիստին ընթացքին ստորագրած են Սուրիոյ մէջ «լարուածութեան մեղմացման գօտիներու ստեղծման շուրջ յուշագիր մը:



Փաստաթուղթը ստորագրած են պատուիրակութիւններու ղեկավարները. Ռուսիոյ կողմէ՝ սուրիական տագնապի լուծման հարցով Փութինի յատուկ պատուիրակ Ալեքսանտր Լարենթեւ, Թուրքիոյ կողմէ՝ Միջին Արեւելքի եւ Ափրիկէի հարցերով արտաքին գործոց փոխնախարար Սետաթ Էօնալ, Իրանի կողմէ՝ արաբական-ափրիկեան երկիրներու գործերով արտաքին գործոց փոխնախարար Հիւսէյն Փապերի Անսարի:

«Մայատին» արբանեակային պատկերասփիւռի կայանը իր կարգին հաղորդեց, որ փաստաթուղթը կոչ կ'ուղղէ մինչեւ 22 մայիս նշեալ շրջաններու քարտէսները պատրաստելու, ինչպէս նաեւ յառաջիկայ 5 օրուան ընթացքին այդ նպատակով աշխատանքային խմբակ մը յառաջացնելու: Ըստ համաձայնութեան, երաշխաւոր երկիրները պարտաւոր են Սուրիոյ կառավարական ուժերուն ու ընդդիմութեան օգնել, որպէսզի վերջիններս շարունակեն ՏԱՀԵՇ-ի եւ Փապիսթ Լուսրայի դէմ իրենց պայքարը:

Սուրիոյ զինեալ ընդդիմութեան պատուիրակութեան երկու անդամներ ցուցադրաբար լքեցին ժողովասրահը՝ բողոքելով Իրանի ստորագրութեան գոյութեան դէմ: Պատուիրակութիւնը աւելի ուշ յայտարարեց, որ Ասթանայի հոլովոյթի երաշխաւոր երեք երկիրներուն միջեւ գոյացած համաձայնութենէն անմասն է: Ձինեալ ընդդիմութեան պատուիրակութեան ղեկավար Մոհամետ Ալլուշ կը բացակայէր լիագումար նիստէն:

3 մայիսին Սոչիի մէջ Ռուսիոյ նախագահ Վլատիմիր Փութին եւ Թուրքիոյ նախագահ Ռեճեփ Թայիփ Էրտողան քննարկած էին լարուածութեան մեղմացման չորս գօտիներու հաստատումը՝ Իտլիպ նահանգին մէջ, Հոմս քաղաքէն դէպի հիւսիս, Արեւելեան Ղութայի մէջ եւ Սուրիոյ հարաւը: Ասթանայի ժողովին մասնակից աղբիւր մը «Սփութնիք»-ին յայտնած է, որ գործնականին մէջ վերոնշեալ չորս շրջաններուն ստեղծման յուշագիրին շուրջ համաձայնութիւն գոյացած է, սակայն տակաւին տարակարծութիւն գոյութիւն ունի մէկ յօդուածի շուրջ:

Թուրքիոյ արտաքին գործոց նախարարութիւնը նշեց, որ Սուրիոյ մէջ մագլցումի մեղմացման գօտիները կը ներառեն Իտլիպի գիւղական ամբողջ շրջանը, ինչպէս նաեւ՝ Հալէպի, Լաթաքիոյ եւ Հոմսի գիւղական շրջաններէն բաժիններ:

Ռուսիոյ արտաքին գործոց նախարար Սերկէյ Լարով երեկ, նախքան Ասթանայի մէջ համաձայնութիւն գոյանալը, յայտարարեց, որ Սուրիոյ կառավարութիւնը համաձայն է երկրին մէջ «լարուածութեան մեղմացման շրջաններ»-ու ստեղծման՝ աւելցնելով, որ անվտանգութեան շրջաններու ստեղծումը պէտք է Սուրիոյ մէջ զինադադարի ամրապնդման կարելոր քայլ դառնայ:

Լաւրով Ֆինլանտայի արտաքին գործոց նախարարին հետ իր միացեալ մամլոյ ասուլիսի ընթացքին ըսաւ, որ Ասթանայի մէջ կը քննարկուի «լարուածութեան մեղմացման շրջաններու» ստեղծման նոր գաղափար մը:

Ան յայտնեց, թէ Մոսկուա կը յուսայ, որ Ասթանայի մէջ Սուրիոյ շուրջ ընթացող բանակցութիւնները ունենան յաջող աւարտ մը: «Մենք մեծ յոյս ունինք, որ ներկայիս Ղազախստանի մայրաքաղաքին մէջ ընթացող ներկայ փուլը յաջողի զինադուլի ամրապնդման, իսկատումներուն հակադարձելու մեքանիզմներու շուրջ համաձայնութեան եւ ականազերծման աշխատանքներու կատարման առումով», ըսաւ Լաւրով:

Ռուսական դիւանագիտութեան պետը նաեւ յոյս յայտնեց, որ այս ամիս Ժընեւի մէջ սուրիական տագնապի քաղաքական լուծման դժուար հարցերուն նուիրուած բանակցութիւնները շարունակուին, եւ սուրիացի ժողովուրդը ինք ճշդէ իր ապագան:

Լաւրով նշեց. «Կարգ մը արեւմտեան պետութիւնները կը փորձեն Խան Շէյխունի մէջ քիմիական զէնքերու դէպքին հետաքննութիւնը ձգձգել»:

Թիլրսընի Եւ Չաուշօղլուի Միջեւ Տեղի Ունեցած Է Լարուած Հեռաձայնային Հաղորդակցութիւն Մը

Թրքական «Կազեթէտուվար» կայքը կը հաղորդէ, որ Միացեալ Նահանգներու արտաքին գործոց նախարար Ռեքս Թիլրսըն եւ Թուրքիոյ արտաքին գործոց նախարար Մելուք Չաուշօղլու Սուրիոյ մէջ տիրող իրավիճակին մասին բաւական լարուած հեռաձայնային հաղորդակցութիւն մը ունեցած են:



Յիշեցնենք, որ 25 ապրիլին թրքական օդուժը Սուրիոյ հիւսիսային շրջաններուն դէմ գործած էր յարձակումներ, որոնց պատճառով սպաննուած էին քրտական ժողովուրդի պաշտպանութեան ջոկատներու 18 զինեալներ:

Կայքը՝ յղում կատարելով Թուրքիոյ արտաքին գործոց նախարարութեան աղբիւրներու, կը գրէ, որ կողմերը չեն կրցած Սուրիոյ մէջ գործող քրտական ուժերու վերաբերեալ համաձայնութիւն գոյացնել:

Նախապէս քրտական ուժերու հրամանատարութիւնը Միացեալ Նահանգներէն պահանջած էր յստակ քայլերու ձեռնարկել Թուրքիոյ օդային յարձակումները կանխարգիլելու համար:

Թրքական կայքը կը նշէ, թէ հեռաձայնային հաղորդակցութեան ընթացքին Թիլրսըն չէ փորձած զսպել իր զայրոյթը եւ բաւական խիստ եղած է, իսկ Չաուշօղլու չէ կրցած շատ բան ըսել:

Նշենք, որ Թուրքիոյ նախագահ Ռեճեփ Թայիփ Էրտողանի խորհրդականներէն Իլնուր Չելիք սպառնացած էր, որ թրքական զինեալ ուժերը անհրաժեշտութեան պարագային կրնան նաեւ հարուածել Սուրիոյ մէջ Միացեալ Նահանգներու դիրքերը:

ԱՆՆՈՒՄ

Ապրիլ 24-Էն Մայիս 6՝ Տարածաշրջանային Իրադրություններու Ազդեցությունները

102-րդ ապրիլ 24-ի լիբանանեան ոգեկոչումները որոշ ուշագրաւ երեւոյթներ պարզեցին, որոնց ուղղութեամբ քարոզաքաղաքական հետագայ ռազմավարական մշակումները նկատառելի կէտեր կը գտնեն անպայման:

Նախ անշուշտ կեդրոնական ձեռնարկին ապահովուած բարձրագոյն մակարդակի պետական այրերու ներկայացուցիչներու խօսքերը, զօրակցութիւններն ու հայութեան իրաւունքներու վերականգնման ուղղութեամբ փոխանցուած մեր Դատին նկատմամբ լիբանանեան համապետական մակարդակի զօրակցական յայտարարութիւնները կարեւոր առաւել արձանագրեցին այս շրջածիրին մէջ:

Իշխանութեան պետերու ներկայացուցիչները կը ներկայացնեն համայն Լիբանանը. համապետական բնոյթը կարեւոր է այս պարագային՝ Յեղասպանութեան հարցին լիբանանցի քրիստոնէայ համայնքներու վերջերս ցոյց տուած զգայնութեան եւ իսլամ լիբանանցիներու այս պարագային դրսեւորած զգուշ վերապահութեան տարբերութիւնները աղիւսելու առումով:

Զմոռնանք. Լիբանանը միակ արաբական հանրապետութիւնն է, որ ճանչցած է եւ դատապարտած Հայոց ցեղասպանութիւնը, իսկ խորհրդարանը այս կամ այն համայնքին ներկայացուցած օրէնսդիր մարմինը չէ, այլ ամբողջ Լիբանանին:

Ինչպէս աշխարհագրական այլ միջավայրերու մէջ, այստեղ եւս Յեղասպանութեան նկատմամբ ցուցաբերուած զօրակցութիւնը կամ զգուշաւորութիւնը ունի քաղաքական շարժառիթ. երբեմն նաեւ ընտրական: Այս բոլորը կը զգացուին անշուշտ, իւրաքանչիւր պահու թելադրած կանոններու ազդեցութեան տակ՝ զօրակցական (կամ զգուշաւորական) պահուածքներու ելեւէջներուն եղանակները ճշդելով:

Միջին Արեւելքի քրիստոնէայ ազգաբնակչութիւնները այսօր ջարդի, տեղահանութեան, կամ ընդհանրապէս ցեղային զտման մնայուն սպառնալիքին տակ են: Խորքին մէջ Ֆրանչիսկոս պապին հնչեցուցած ահազանգը Հայոց ցեղասպանութեան 100-րդ տարելիցին առիթով ճիշդ այս խոր ճգնաժամին կը վերաբերէր: Այն համեմատութիւնը, որ կատարեց պապը 20-րդ դարու առաջին ցեղասպանութեան եւ 21-րդ դարուն գործադրուող ցեղային զտումներուն միջեւ այդ վտանգին ընդգծումն էր՝ անուղակիօրէն հասցեական մեղադրանք կատարելով առաջինի պարագային ուղղակի ցեղասպանութիւն գործադրածին եւ երկրորդի պարագային ցեղասպան պետութեան այսօրուան ժառանգորդին կողմէ միջնորդաւորուած եղանակով իրականացուող ցեղային զտումներուն բուն պատուիրատուներուն:

Այստեղ ուրեմն կը ստեղծուի Թուրքիոյ ժխտական դերակատարութեան համաքրիստոնէական ընդհանուր ընկալում մը: Այդ ընկալումն է, որ կը դրսեւորուի նաեւ ոչ միայն Հայոց ցեղասպանութեան ձեռնարկներու մասնակցութեամբ եւ զօրակցութեամբ, այլ ուղղակի նաեւ նախաձեռնողականութեամբ:


Բնականաբար թրքական դերակատարութեան այս ընկալումը միայն Հայոց ցեղասպանութեան նկատմամբ զօրակցական ալիքներու մակընթացութիւններով չի բացատրուիր: Ահա այստեղ է, որ վտանգի անմիջականութիւնը զգալով հաւաքական յիշողութիւններու վերագարթնում տեղի կ'ունենայ. հայկական գործօնը այս ուղղութեամբ ընելիք ունի եւ ըրա՛ւ, երբ քաղաքական բեմերէ յիշեցուց սովամահութեամբ ծրագրուած ցեղասպանութիւնը: Իսկ այս ուղղութիւնը ստեղծուած պահը օգտագործելու առիթին մասին կը յուշէ. մայիս 6-ը այս առաջադրանքի խորհրդանիշ թուականն է: Նաեւ այն առումով, որ հակաթրքական տրամադրութիւններու բարձրացումը միակողմանիօրէն քրիստոնէական շրջանակներուն մէջ չի ձգեր. մայիս 6-ի նահատակները լիբանանեան հասարակութիւնը բաղկացնող բոլոր համայնքներուն կը պատկանին:

ԼՈՒՐԵՐ ԳԱՂՈՒԹՆԵՐԷՆ

Հայ Մշակութային Հիմնարկության Սան Ֆրանսիսքոյի Մասնաճիւղի Հանգանակային Տարեկան Ձեռնարկը

1 ապրիլին Միլպրեյի «Կրին Հիլզ Քաունթրի Քլապ»-ի սրահին մէջ տեղի ունեցաւ Հայ մշակութային հիմնարկութեան Սան Ֆրանսիսքոյի մասնաճիւղի հանգանակային տարեկան ձեռնարկը:

Օրուան հանդիսավար Գոհար Մոմճեան բարի գալուստ մաղթելէ ետք ներկաներուն ներկայացուց օրուան բանախօսներուն կենսագրական գիծերն ու ազգային գործունէութիւնը:



Յանձնախումբի ատենապետ Րաֆֆի Մոմճեան իր ելոյթին մէջ մասնաւորապէս շեշտեց Հայ մշակութային հիմնարկութեան Սան Ֆրանսիսքոյի մասնաճիւղին տարած ու տակաւին տարուելիք աշխատանքներուն կարեւորութիւնը՝ հաստատելով, որ մասնաճիւղը կ'աշխատի տեղական հայկական կազմակերպութիւններու հետ, յառաջ տանելու ու բարձրացնելու հայկական ժառանգութիւնը, կրթական եւ մշակութային ծրագիրները՝ հայկական համայնքներուն մէջ: Ան նկատել տուաւ, որ տարիներու ընթացքին հիմնարկութիւնը հոգացած է կրթաթոշակները Հայաստանի Ամերիկեան համալսարանի աշակերտներու, նաեւ, Արցախի Ուխտասար գիւղին մէջ հիմնած է առողջապահական կեդրոն մը եւ նախաձեռնած է դրամահաւաքի մարմինի մը՝ օգնելու համար սուրիահայութեան:

Հանդիսութեան ընթացքին ցուցադրուեցան երկու տեսերիզներ, որոնք ներկայացուցին Հայաստանի մէջ իրականացուած կարգ մը շինարարական եւ այլ աշխատանքները:

Սան Ֆրանսիսքոյի Հայ Երիտասարդաց Դաշնակցութեան անունով ելոյթ ունեցաւ տեղւոյն ՀԵԴ-ի ատենապետ եւ ՀԵԴ-ի Կեդրոնական վարչութեան անդամ Գրիգոր Տէր Աբրահամեան, որ ՀԵԴ-ի «Երիտասարդական ջոկատներ» ծրագիրին հետ երկու անգամ գտնուած է հայրենիք եւ յատկապէս՝ Արցախի Ասկերան գիւղը: Այս առթիւ ան տեղեկութիւններ փոխանցեց այդ այցելութեան մասին եւ եզրափակելով իր խօսքը հաստատեց, որ հայրենիքի մէջ կամաւոր գործը մեզի հոգեկան գոհացում կու տայ, նաեւ մեր երկրի ժողովուրդը կը մղէ ամէն ձեռով յաղթահարելու որեւէ դժուարութիւն:

Ապա, օրուան մեծարեալ՝ Հայաստանի ամերիկեան համալսարանի տնօրէն դոկտ. Արմէն Տէր Կիրեղեանի յանձնուեցաւ գնահատական յուշատախտակ մը՝ Հայ մշակութային հիմնարկութեան կողմէ, առ ի գնահատանք իր երկար տարիներու ազգանուէր ծառայութեան համար: Դոկտ. Տէր Կիրեղեան իր խօսքին մէջ շեշտեց Հայաստանի ամերիկեան համալսարանին (ՀԱՀ) հաստատման կարեւորութիւնը՝ Հայաստանի ապագային համար: Ան գոհունակութիւն յայտնեց այն մասին, որ կը ծառայէ այդ պաշտօնին եւ այդպիսով իր նպաստը կը բերէ Հայաստանի բարեկաման:

Օրուան բանախօսն էր «Հայաստան» համահայկական հիմնադրամի նախկին ատենապետ Անդրանիկ Պաղտասարեան, որ հաստատեց ՀՅԴ-ի ունեցած գերկարեւոր դերակատարութիւնը հայ ազգի եւ հայոց պետականութեան պատմութեան մէջ: Ան նկատել տուաւ, որ ժամանակն է

արժեւորելու եւ գնահատելու Հայաստանի տպաւորիչ յառաջընթացը, որուն մէջ մեծ դեր ու ներդրում ունեցած է աշխարհասփիւռ հայութիւնը:

Եզրափակելով իր խօսքը՝ Ա. Պաղտասարեան ըսաւ, որ հայկական իրականութեան մէջ մէկ բան ունինք մնայուն, որ մեր հայրենիքն է, մեր ազատ ու անկախ Հայաստանը եւ յորդորեց ներկաները հետեւելու մեր մեծերու երազանքին եւ համախմբուելու մեր անկախ հայրենիքին շուրջ:

Երեկոյին ընթացքին գոյացաւ շուրջ 60 հազար ամերիկեան ստուար, որ պիտի գործածուի Հայաստանի ու տեղական կարգ մը կարիքներուն:

Հայոց Լեզուին Նուիրուած Համագումար

Նախաձեռնութեամբ Փորթուգալ-Հայաստան բարեկամութեան միութեան 5 ապրիլին Լիզպոնի համալսարանի գրականութեան բաժանմունքին մէջ տեղի ունեցաւ «Հայոց լեզուի օր» խորագիրով համագումար: Նախքան համագումարը, բաժանմունքի նախասրահին մէջ կայացաւ Հայաստանի նուիրուած լուսանկարներու ցուցահանդէս մը, ուր ներկայացուած էր մեր մշակոյթը եւ պատմամշակութային կարեւոր յուշարձանները:

Գրականութեան բաժանմունքի փոխսնօրէն, փրոֆ. Ժուաու Տիոնիզիօ իր ելոյթին մէջ ընդգծեց ձեռնարկին կարեւորութիւնը եւ նշանակութիւնը:

Փորթուգալ-Հայաստան բարեկամութեան միութեան նախագահ Վահէ Մխիթարեան ներկայացուց միութեան աշխատանքները եւ խօսեցաւ ապագայի ծրագիրներուն մասին: Ան նկատել տուաւ, որ կը նախատեսուի յառաջիկային երկու համագումարներ իրականացնել՝ «Հայերը՝ որպէս գիտութեան եւ նորարարութեան ազգ» եւ «Հայկական միջնադարեան ճարտարապետութիւն եւ եկեղեցաշինութիւն» խորագիրներով:



Համագումարը վարեց Փորթուգալ-Հայաստան բարեկամութեան միութեան հիմնադիր անդամ Լիա Խաչիկեան: Ան ամփոփ կէտերու մէջ ներկայացուց հայոց լեզուն եւ մշակոյթը՝ անդրադառնալով հայերէնի աշխարհագրական տարածման, լեզուի պատմութեան եւ զարգացման փուլերուն, գիրերու ստեղծման, այբուբենի կազմութեան եւ հետագայ փոփոխութիւններուն, արեւմտահայերէնի եւ արեւելահայերէնի հիմնական հնչիւնաբանական

Եւ բառապաշարի տարբերություններուն: Ան անդրադարձաւ նաեւ Հայաստանի եւ Պատմական Հայաստանի տարածքին մէջ առկայ բարբառներուն՝ ընդհանուր տեղեկություններ փոխանցելով լեզուի քերականական կառուցուածքին մասին:

Համագումարին ընթացքին փորձագայլի մասնակիցները կարելիութիւն ունեցան նաեւ ծանօթանալու հայ ժամանակակից քնարերգութեան հետ:

Աւարտին ելոյթ ունեցաւ միութեան հովանիին տակ գործող «Կոնստանսիա» լարային նուագախումբի մենակատարներէն կազմուած քառեակը:

Խաչքարի Չետեղում Քորտոպայի Մէջ

18 ապրիլին Քորտոպայի հրապարակին վրայ տեղի ունեցաւ արժանթինահայ Քրիսթիան Մերտինեանի կողմէ նուիրուած խաչքարի բացումը, ներկայութեամբ փոխկառավարիչ Մարթին Լարիորայի, քաղաքապետ Ռամոն Մէսթրի, Հայաստանի դեսպան Եսթեր Մկրտումեանի, Արժանթինի եւ Չիլիի առաքելական եկեղեցւոյ առաջնորդ Գիսակ Էպս. Մուրատեանի, կաթողիկէ եկեղեցւոյ արքեպիսկոպոս՝ Քարլոս Նանէզի եւ Քորտոպայի հայկական համայնքի նախագահ Էտուարտո Թուրուշեանի:



Նշենք, որ Քորտոպայի Արժանթինի մէջ գտնուող երկրորդ մեծ քաղաքն է, որ կը հաշուէ չորս միլիոն բնակիչ, որոնց հինգ հազարը հայեր են եւ անոնք կարեւոր դերակատարութիւն ունին քաղաքին մէջ: Քորտոպայի մէջ կը գտնուի նաեւ Արամ Երկանեանի աճիւնները եւ յուշարձանը:

Թուրք Արուեստագէտի Ցուցահանդէսը՝ Նուիրուած 1915- Էն Մինչեւ Այսօր Տեղի Ունեցած Բռնագաղթերուն

Վերջերս տեղի ունեցաւ թուրք արուեստագէտ Արգու Բաշարանի «Թերեւս այնտեղ» խորագիրը կրող ցուցահանդէսին բացումը, որուն միջոցով ան ուզած է ժողովուրդին ուշադրութիւնը հրաւիրել երեւոյթի մը, որ սկսած է Հայոց ցեղասպանութեան ժամանակներէն եւ ներկայիս ալ տարածուած է Սուրիոյ եւ Տիգրանակերտի մէջ:

Բաշարան իր ներկայացուցած պատկերներուն ընդմէջէն փորձած է արծարծել բռնագաղթի թեման: Թրքական medyascope.tv կայքին հետ զրոյցի մը ընթացքին ան յայտնեց, որ այդ ցուցահանդէսին իմաստը այն է, որ պէտք է հաշտուիլ կատարուած իրողութիւններուն հետ, ինչպէս՝ Հայոց ցեղասպանութեան, Ռուսոստայի, Պոսնիայի կոտորածներուն եւ վերջին տարիներուն Տիգրանակերտի մէջ տեղի ունեցած դէպքերուն վերաբերեալ:

Բաշարան նշեց, որ այդ զգացումը իր մօտ յառաջացած է Հրանդ Տինքի սպանութենէն ետք: Ան ըսաւ, որ ցուցահանդէսը չէ սահմանափակուած միայն 1915 թուականով, այլ կը պատմէ նաեւ այսօր Սուրիոյ եւ Տիգրանակերտի ժողովուրդին մասին, որոնք իրենց տուններէն զրկուելով դատապարտուած են գաղթի:

Ցուցահանդէսը պիտի տեսնուի մինչեւ 15 մայիս:

ԱՅԼԱԶԱՆ

Խնձորի Քացախի Բուժիչ Ցատկությունները

Խնձորի քացախը ո՛չ միայն կը բուժէ կարգ մը հիւանդութիւններ, այլ նաեւ կը կանխարգիլէ անոնցմէ շատերուն յայտնութիւնը: Այս աժան եւ մատչելի սննդամթերքը անպակաս պէտք է ըլլայ մեր տուններէն: Չմոռնանք ընտրելու որակաւորը եւ բնական միջոցներով պատրաստուածը: Շուկայէն գնուած պատահական եւ անձանօթ տեսակները կրնան նոյնիսկ վնասակար դառնալ:

Ահա թէ ի՛նչ բաներու կ'օգնէ խնձորի քացախը:

- Կը դիւրացնէ մարսողութիւնը: Մէկ բաժակ ջուրի մէջ դգալ մը խնձորի քացախ, դգալ մըն ալ մեղր աւելցնել, լուծել եւ օրական մէկ բաժակ խմել:
- Կը կարգաւորէ արեան բարձր ճնշումը: 150 միլիլիթր ջուրի մէջ 2 դգալ խնձորի քացախ աւելցնել եւ խմել օրական 1 անգամ:
- Կը մեղմացնէ ստամոքսի ցաւը:
- Կ'օգնէ նիհարնալու:
- Կը դարմանէ կոկորդի ցաւը:
- Կը դարմանէ գերզգայնութիւնները:
- Կը չէզոքացնէ բերնի անախորժ հոտերը եւ կը հականէիւ բերանը:
- Կը նուազեցնէ քոլետերովի բարձր տոկոսը:
- Կը չէզոքացնէ մազին թեփը:
- Կը դարմանէ դէմքին բշտիկները:
- Կը ձերբազատէ գիշերային մկանի պրկումներէ:
- Կը սպիտակեցնէ ակոսները:
- Կը չափաւորէ շաքարի տոկոսը՝ արեան մէջ:



Բոլոր պարագաներուն ալ խնձորի քացախը պէտք է լուծել ջուրի մէջ եւ խմել կամ մորթին քսել առանց չափազանցելու:

Անգլիոյ Թագուհին Եւ Իր Սեւ Պայուսակը

Երբ Անգլիոյ Էլիզապէթ Բ. թագուհին հանրութեան մէջ կը յայտնուի, ան երկու հիմնական արքեսուարներ կը կրէ՝ գլխարկ մը եւ սեւ փոքրիկ պայուսակ մը:

Հաւաստի աղբիւրներու համաձայն, թագուհին իր սեւ պայուսակին միջոցով կարճ եւ արագ պատուէրներ կը փոխանցէ իր անձնակազմին: Այսպէս՝ եթէ թագուհին ընթրիքի մըն է եւ իր սեւ պայուսակը սեղանին վրայ դրած է, կը նշանակէ որ ընթրիքը վերջ պիտի գտնէ յառաջիկայ 5 վայրկեաններուն ընթացքին: Իսկ եթէ պայուսակը գետին դրած է, կը նշանակէ, որ կ'ուզէ վայրկեան առաջ վերջ տալ անախորժ խօսակցութեան մը:

Թագուհին իր սեւ պայուսակին մէջ կը կրէ փոքրիկ հայելի մը եւ շրթներկ մը, կարդալու ակնոցներ, անուանի համով փոքրիկ շաքարներ եւ ինքնահոս մը: Էլիզապէթ թագուհին իր սեւ պայուսակին մէջ ունի նաեւ բջիջային հեռախօս մը՝ իր թոռնիկներուն հետ կապուելու համար: Նոյն լաւատեղեակ աղբիւրներուն համաձայն, սեւ պայուսակին մէջ կան ընտանեկան լուսանկարներ եւ թոռնիկներէն մնացած փոքրիկ արձանիկներ... Հետաքրքրականը այն է, որ Անգլիոյ թագուհին իր սեւ պայուսակին մէջ ոչ անցազիր, ոչ բանալի եւ ոչ ալ դրամ կը պահէ... Այս ալ թագուհիին վերապահուած առաւելութիւն մըն է:

«Ազդակ»-ի Ֆոնտին

«Ազդակ»-ի 90-ամեակին առիթով, քաջալերելով «Ազդակ»-ի աշխատանքները, **Քուէթէն հետեւեալ ազգայինները թերթին կը նուիրեն.**

Մունիր Դարբինեան	2300\$
Կիրակոս Գոյումճեան	1500\$
Ֆիլիփ Փաթաթանեան	350\$
Անուշաւան Նազարեան	350\$
ՀՄԸՄ-ի Քուէթի մասնաճիւղի վարչութիւն	200\$
ՀՕՄ-ի Քուէթի մասնաճիւղի վարչութիւն	200\$
Ալեքսան Պերպերեան	200\$
Յակոբ Պերպերեան	200\$
Յակոբ Պետիրեան	200\$
Յարութ Պետիրեան	200\$
Տոքթ. Ժան Պէպէճեան	200\$
Դաւիթ Թադոյեան	200\$
Յակոբ Էմրազեան	200\$
Անդրանիկ Գարակէօզեան	150\$
Քեռի Սարգիսեան	150\$
Մեսրոպ Թասլաքեան	100\$
Յակոբ Յովակիմեան	100\$
Եղիկ Կարպուշեան	100\$
Տոքթ. Ներսէս Սարգիսեան	100\$
Յակոբ Թադոյեան	100\$
Յարութ Զաքարեան	100\$
Պերճ Կէնճոյեան	100\$
Բաֆֆի Յովսէփեան	100\$
Զարեհ Յակոբեան	100\$
Գօգօ Թիւթինճեան	100\$
Մայք Քասունի	100\$
Արմէն Արմուտճեան	100\$
Պօղոս Այվազեան	100\$
Վահան Մարտիրոսեան	100\$
Կոստանդին Մումճեան	100\$
Մարքօ Պապլանեան	100\$

WWW.AZTAGDAILY.COM